

19. marts 2014

UPA 2014/128
Ruth Heilmann

Uunga siunnersuut: Sermip erngullu avammut nioqqutissatut ator-neqarnissaat pillugu Inatsisartut inatsisaata allanngortinnissaanut si-unnersuut nr. 7 31. maj 2001-imeersoq (sermip erngullu avammut ni-oqqutiginnissaannut inatsit). (Inuussutissarsiornermut Aatsitassanullu Naalakkersuisoq)

Siumumit inatsimmut allannguutissatut siunnersuut tunngaviatigut akuersaarparput.

Namminersornermut inatsisip 21. juni 2009 atuutilernerani pisortanut taaguut “Namminersornerullutik Oqartussat” “Namminersorlutik Oqartussat”-nut allanngortinneqarpoq.

Ulloq kalaallit nunatta inuinit puigunaatsoq pingaartorsiorfiusorlu. Taamatut nunatta politikkikkut angusaqarnera alloriarneruvoq pingaarutilik taamaattumillu inatsisaasunut aamma taaguummik allannguineramik malitseqartitsisoq. Taamaattumik aamma sermip erngullu avammut nioqqutissatut ator-neqarnissaat pillugit inatsimmut taaguummik allannguineramik aaqqiissuteqarnissaq maanna Naalakkersuisut saqqummiuppaat.

Siumumit ajoraluartumik oqaatigisariaqarparput ullumimut nunatsinni sermip erngullu iluaqutigineqarnera suli annikitsuaraannavoq. Tamanna pissuteqartinneqartarpoq maani nunatsinni allat nunat tunisassiaasa pisiassatut annertuumik ammatinneqarnerat. Soorunami nunatta ernga minguitsuullunilu peqqinnartorsuummat kuuginnartorsuummallu imerluartarparput, ilaannilu ruujorit ilaat kajorpallaaraangata imersiniartariaqartarpugut, aammalu iluarpoq Qeqertarsuarmeersoq imeq 938 pissarsiarisinnaasaratsigu akissaqartiluta. Sermip erngullu nunatsinni pisuussutitta angisuut ilaattut isigalugu matumuunakkut inuussutissarsiutigalugu akissarsiutigineqarnerata suli annertunerulersinneqarnissaa periarfissaqarluarsinnaasoq Siumumit isumaqarpugut.

Tupinnartuunngilarmi sermip erngullu avammut nioqqutiginnissaanut inatsimmut tunngatilugu akileraartarnikkut akitsuutinillu akilioraanermik nakkutilliinermi periutsinik qulakkeerisumik erseqqarinnerusumillu inatsiseqarnissaq pisariaqartinneqarmat. Mannami tikillugu Kalaallit Nunaanni sermimik imermillu nunanut allanut tunioraanissaq siunertaralugu atuneq killeqarsimavoq, taamaattorli Naalakkersuisut isumaqarput maleruagassanik periutsinillu naleqqussaaneq pisariaqartoq akuersissuteqareernermi nakkutilliinissamut najoqqutassaarnissaq soorunami pissusissamisoormat.

Tamannalu Siumumit isumaqatigaarput pisariaqarluinnartutullu isumaqarfigalugu.

Sermimik imermillu Iluaquteqarnissamut akuersissummik pigisaqartut ingerlatartik pillugu ukiut tamaasa nalunaaruteqartarnissaat aammalu ingerlatap avatangiisinut sunniutai pillugit nalunaaruteqartarnissaminnut piumasaqarfigineqartarnissaat Siumumit isumaqatigaarput.

Tusarniaanermi akissutigineqartuni maluginiarparput piumasaqaatinut ilaatinneqaqqullugu kissaatigineqarmat Akileraartarnermut aqutsisoqarfik nakkutilliisarnissamut piginnaanilerneqarnissaanik inatsimmi ilaatinneqarnissaa, tamanna Naalakkersuisunit qanoq isumaqarfigineqarnersoq paaserusunnarpoq.

Taamatut Siumumit oqaaseqarluta inatsisissamik siunnersuut ilalerparput Inuussutissarsiornermullu Ataatsimiititaliamut ingerlatinneqarnissaa innersuussutigaarput.